

文
菴
集



欽定四庫全書

文莊集卷十五

宋夏竦撰



奏議

擇牧議守奏

伏以今之牧守當古諸侯權有生殺祀有社稷其人存則王澤下流天時無害庶官各守其序四民不遷其業其職廢則旱蝗肆孽瘡痍徧野政出于吏胥獄成于賅賂故國之股肱莫先其任漢宣有言曰與我共治者其

惟良二千石乎國家之制貴尚州牧在顯忠遂良于斯
為盛而求賢審官或未純一頗有因緣久次出分符竹
結託貴要遂頌藩條或得用于虐刑或成名于厨傳以
以是奉法各異為政差殊强者失於猛寬者失于縱謹
者失于凝滯敢者拳造次和弊于党狠者弊于戾或貪
而有能廉而無材明于法令拙于化育喜于慈惠踈
于防戒雖材不求備難以適中而在官惟賢固宜慎遠
然則罪莫大于貪暴愚莫甚于闇懦去此而往其失可
追伏願陛下委任台司議新其職明考課之令重刺舉
之權自非該通學術熟習政事者不得除授仍歲詔尚
書省上其殿最明示賞罰若為治有狀則即郡進爵但
其善化不渝何必三年而代無使人疲于迎送官弊于
數易惟陛下念之夫隆守文之業增太平之基不在斯
人誰塞其責

擇令佐奏

伏以國家安危本乎蒼生蒼生治亂繫乎宰宰之官於民

甚觀古者子男之國本為令佐之任故漢昭郎官出宰百里百里之任非材不居國家之制若何輕之春秋之義用賢治不肖用貴治賤方今令佐弊居叢睦或醫師畫工之詐貧窶京百司吏之論久次貴游子弟之序資蔭京朝職官之遭削奪者皆得調授州縣之間吏道益雜率多不善文法罕諳政事下有妻孥以牽其上無清華以誘其望樂於因循甘於求賂皆曰過且罰不失為同類罪且棄不失為豪民以是而觀非用賢治不肖者也況州縣之儀苦於庸賤稽首階墀廝役公府民之疾苦不能抗行州之蠶食不敢力禦或牧守非材好自尊大輕視王之命臣不若已之僕御賢者忍耻懶圖政事愚者徇財不顧輕辱以是而觀非用貴治賤者也夫用不肖治不肖則政弊用賤治賤則民不服以水濟水誰能食之嗚呼縣境相壓令長比肩一清九濁尚為多賢比屋空虛百里瘡痍傷天之和致時之災不在斯人誰當其咎伏願陛下軫念元元垂意今佐擇其材能除其不

金定四庫全書
卷十五
肖貴其爵服去其庸賤合仲尼春秋之義流先王受民之惠則太平之化可階而至矣

去貪吏奏

伏以賂不行之謂公朝脂膏不行之謂良吏公朝正則瘠民悅良吏存則善政舉故政以賄成傳書其罪貪人販類詩刺其姦蓋為政忌貪貪則憎愛憎愛則舞文暴物無所不至孽憲法特峻其科拒其誅剝則涇渭莫分餌之幣帛則鈎粒共直銓選之司貪吏先而廉吏後鞠詢之

寺豪民直而貪民枉會府不絕于請求棘寺頗聞于市法幸居清要則市甲乙之科覬蒙超擢則買清白之舉中官受命率訪珍奇武士在官多謀聚歛牧守納賂于珠金令佐受獻于絲穀郡遇督察之官則瘡痍累月邑經簡稽之使則罷弊踰時或吏蒙其上朝輸其貨則夕淪受福暮違其求則辰起當咎富者傾資竭產以赴其急貧者質妻鬻子以救其苦蒼生雖痛誅求賍吏罕聞敗露蓋人懼仇讐事微證引旁無糾擿之吏上多容匿之徒君子

忍耻而不言有位制姦而寡術伏願陛下寬直言之罪
嫉幸民之弊內擇憲臺之吏專察百司外選剛正之官
分按天下採聽民教稽驗政迹無狀者投畀荒裔生賍
者禁錮終身庶當仁義之朝皆勵廉平之節

原文德奏

伏以文乃國章國寶文體觀盛衰鑒興亡察奢儉考受
惡莫近乎文唐虞之典辭大意明並禹之謨氣真體壯
太康失邦五子之歌悲且怒太甲不明伊尹之書戒而

諒周德盛而閔睢樂王道衰而黍離怨秦風舊而車鄰
大唐德遺而蟋蟀儉說辭偏而戰國亂仙詩邪而秦室
壞漢德寬大文比三代義本六經而旁引災異豈雜霸
之道見於文乎哀平之衰讖緯亂典遷洛之後其弊風
流但著述之文氣尚清壯魏晉以降文采勝質江左之
風虛澹為工裴子野劉勰之譏諒不誣矣李唐氏作緝
熙禮樂多士盈庭辭有雅氣迨其叔世旋亦輕靡五代
亂離諸侯僭竊辭體異懦幾於墜地國家駿命攸隆王

道馴致材為世生文德宏壯四代而下無或比崇而近
歲學徒相尚浮淺不思經史之大義但習雕蟲之小技
深心盡草木遠志極風雲華者近於俳優嗜者幾於鄙
俚尚敬律而忽規箴重儷偶而忘訓義况陛下睿謀如
天聖政淳素若何逢掖之生乃循流蕩之弊伏願朝廷
用醇儒激勵浮俗考試之制推先策問非五經不得以
對非常道不得以言但以義理為尚不以敬韻為限則學無
濫進人知嚮方不數年間文必大變跨東周郁郁之
美抑西漢煥乎之盛惟帝念之其道非遠

議貢舉奏

伏以隋設進士之科唐氏特隆其選歲登榜帖不過三
十賢俊之器將相之具在其中諒不虛語然主司慎選
弊於回撓豪右角逐之衢是非鋒起之場進孤寒則道
直而有悔私權貴則道枉而無咎貢舉之間因循滋弊
國家大設場屋旁求髦俊雖搜賢之禮博於虞夏而登
科之士冗於隋唐濫者或輩進材者或旅退薦書未達

於免旒馳轂已滿於塗路求夫厥由其弊斯在始則天下州郡薦送冗雜祝謁已先秋賦里選何有至公擇官一郡選賢數縣錚錚佼佼推為翹楚故大藩動盈百數支郡不遠百里一賢無乃多矣次則省試有司優容過當或以三應五上華顛軫背嘗對揚金殿投薦邊城皆蒙姑息取預科級明試之道無乃遠乎若萬方上計局鍵貢闈衣冠鱗萃而萬數卷軸山積而億計良楛相雜精粗交半銓品之官不踰五員考試之限不越三旬雖周孔無以施其鑿荀孟無以展其材况主司不一好尚差殊學喜者注意於策論修辭者宅心於詩賦簡略者鄙其闕衍綺麗者輕其質直鑿裁既紛品題乃惑緇素無常色金土無定價燕雀遇便風則高翔千仞蛟龍無尺水則困於泥塗故工拙之狀多乖外望致踈競之士騰口謗議為朝廷計者莫若改立制度頒下郡國自今本道舉人各於都會取解專委輸運之使慎擇秋賦之官選承良士上名禮部朝廷於是選官十員立限一季先則

欽定四庫全書
卷十五
品題所業次乃詳考呈試不以場籍年齒御試遠人妄
分條目濫居等級但詩賦策論俱善為上等詩賦優而
策論劣策論優而詩賦劣者為中等自餘不逮皆從駁
放擇材而升不限其數奏名之日則榜列程試合格
者自省門而右丹筆題注明下臧否標其警策之辭識
其疣贅之語凡於卷末統論得失合送合落各令知悉
如有不當並聽言上是則主司無啓倖之門薄徒有知
遇之心進人以禮必也是乎

平筦權奏

伏以齊桓疆主夏盟始議益缺漢武外事夷狄乃興筦
權魏晉周隋沿革非一唐氏因之兼增權數貞元之際
復行茶稅山海之饒盡於國矣夫天地之利與民共之
藏財於民非欲盡取故曰民之不足君孰與足又曰百
姓足矣君孰與不足蓋君以民為心民以君為體未有心勞而體
逸支瘠而身壯者也國家富有征稅充牣府藏雖君王之心務
推寬大而聚斂之臣競為苛細刻取羨餘不知紀極至

於海濱之民食無鹽滋山居之人飲無茶味若有負販
必與吏共是綱密於平民而法寬於姦猾權酷之制近
年尤急或增見在之課或追已亡之額或明下詔條公
相剗奪所入至微而爭端鋒起州縣之獄自此滋豐竊
為陛下惜之夫筦榷不可廢可以平其法法不必急急
則民望於上亦不必緩緩則利歸於下在任庶平之官
使喻朝廷之意削除冗制務存大體上不虛國下不迫
民則改在其中矣孟子曰文王之囿七十里人以為小
蓋與民共之也夫以利共之以道取之以禁防之以籍
正之偏行而不盡雖禁山錮海而民不為怨矣

抑僂釋奏

臣聞舜禹商周之有天下文以經邦國武以戡禍亂政
以齊民教以尊俗故家給人足元元豐厚漢民陵遲魚
目入珠樹黃老之談道浮屠之源歲月滋深枝派寢茂
蕭梁之佞象教勃興李唐之譎真風益廣招藏游惰蠹
耗衣食誕誑吾民十室而九雖間有鉅儒輸誠獻諫深

根固蒂無以拔去國家經啓古義深抑流弊狹度人之
制峻修崇之禁九州穆若有識交慶而大藩尚踰千人
小郡猶登百輩訪諸輿議其倖可知皆言京城寺觀每
歲頗得度人或暫考經業或但聞久次便受戒錄即登
名籍回遠之徒游手之民皆擔簦負幣求度輦下詩云
商邑翼翼四方之極又曰率土之濱莫非王臣豈有書
軌混同憲章殊異又聞其徒豪右多聚貨泉因誕降聖
辰仰望王澤或徼幸命服希覬寵號仲尼曰惟器與名
不可以假人忍使恩耀光被髡褐求之典籍甚為無謂
伏願陛下恭循典法錫命司存省度人之禁去紫衣之
制庶令驕慢之民罕趨浮惰之業聖朝善政自可遵行
仁義何必恢崇釋老而後教化式孚區區之言伏待裁
擇

總大綱奏

臣聞易曰堯舜垂衣裳而天下治語曰無為而治者其
舜乎詩曰不識不知順帝之則非謂端拱黃屋不親庶

政納進熟之計受蒙成之福蓋言聖人勞于求賢逸于
得士左右前後股肱耳目皆任循良一人虛心以順天
下則可以無為矣夫天者君道也四時者臣道也君當
清明以象天臣當生殺以象四時仲尼曰天何言哉四
時行焉百物生焉古先明王靡不由此國家中外清謐
朝廷肅雍陛下監視萬幾勞神日昃至有論報刑徒簡
稽卒伍皆抵軒陛寔煩清問臣聞百官承式各有司存
正則有賞濫則有罰但令恪守條章豈皆取必于上若
陛下英睿聖神無得而量至于耳目視聽固亦有限日
出臨朝表奏雲集次其大綱奮以宸斷猶不暇給况親
其委細勞動聖躬臣竊恐違上事宗廟下撫億兆之意
願陛下選任賢達責成官事至于閱罪簡卒之比自國
家大計理于政教者稍委之所貴庶政簡務清符合太
一宸體逸豫永享萬壽是則塵露之微少裨萬一

謹邊防奏

臣聞防邊扞寇其要有四遠烽候明約束謹關梁慎間

謀遠烽候則寇鈔不至明約束則守禦不急謹關梁則
姦覘不行慎間諜則敵情可得不知烽候約束之道者
不能無禦敵之患不知關梁間諜之事者不能有得
敵之利善守邊者令敵不知所攻掠姦不知所刺探敵
動靜之計進退之期山川之勢法令之制知之而後制
之譬如乘高建瓴方今邊邑使領循守規轍政無竒狀
以警寇心晝日喧呶唯諾昏夜傳呼更漏暇則飲醖教
觴急則方陳甲馬寇至則扃鍵城郭受圍則坐食芻粟
內無竒兵外無相援四野蒼生任為魚肉以此守邊殆
非良畫誠宜選任梟雄列分遠鎮堅甲精金勻於給授
寇來勿縱敵去勿追仍任偏裨經畧邊境相為肘腋互
張敵勢數年之間深務完葺是則邊民既安邊用亦足
矣

洪州請斷祆巫奏

臣聞左道亂俗祆言惑衆在昔之法皆殺無赦蓋以姦
臣逆節狂賊亂規多假鬼神搖動耳目漢之張角晉之

孫恩偶失防閑遂至屯聚國家宜有嚴制以肅多方竊以當州東引七閩南控百粵編氓右鬼舊俗尚巫在漢藥巴已嘗翦理爰從近歲傳習滋多假託機祥愚弄黎庶勦絕性命規取貨財皆於所居塑畫魑魅陳列幡幟鳴擊鼓角謂之神壇嬰孺襁褓已令寄育字曰壇留壇保之類及其稍長則傳習祇法驅為童隸民之有病則門施符術禁絕徃來斥遠至親屏去使物家人營藥則曰神不許服病者欲飯則云神未聽飧率令疫人死於饑渴洎至亡者服用又言餘崇所憑人不敢留規以自入若幸而獲免家之所資假神而言無求不可其間有孤子單族首面勿妻或絕戶以圖財或害夫而納婦浸淫既久習熟為常民被非辜了不為怪奉之愈謹信之益深從其言甚於典章畏其威重於官吏竒神異像圖繪歲增邪錄祇符傳寫日夥小則雞豚致祀斂以還家大則歌舞聚人食其餘胙婚葬出處動必求師劫盜鬪爭行須作水蠹耗衣食眩惑里閭設欲扇搖不難連結

在於典憲具有章條其如法未勝茲葉弗瘳疾宜頒
峻典以革祆風當州師巫一千九百餘戶臣已勒令改業
歸農及攻習鍼灸之脈所有手納祆妄神象符籙神衫
神杖魂巾魂帽鍾角刀笏沙羅等一萬一千餘事已令
焚毀及納官訖伏乞朝廷嚴賜條約所冀屏除巨害保
宥群生杜漸防萌少裨萬一

欽定四庫全書

文莊集卷十六

上書

上章聖皇帝乞應制舉書

景德二年十一月將仕郎守潤州丹陽縣主簿臣夏竦
謹齋戒昧死再拜上書崇文廣武聖明仁孝皇帝陛下
伏以國家采漢唐故事恢復制科網羅賢俊鎔範太平
陛下聖政日躋廣分條品崇二聖之丕緒冠百王之盛

事萬方文明多士勇進嘉魚有得賢之詠白駒無空谷
之戀臣生逢聖明幼肄簡牒久困寒賤不能自達去年
秋薦名天府屬邊障多故羽書益午陛下臨遣宰臣折
衝河朔先臣供傳遽之職立矢石之地忘家徇國失身
行陣陛下哀臣狄勿仕之州縣鞅掌之暇服膺稽古欣
覩明詔遽釋幽慮何則陛下廣文武之科而興文武之治
夫鉛槧方策文之器也辭藻辯博文之用也御器以道
則仁義忠信無所不至矣御用以變則刑政教化無所
不達矣步騎金革武之器也敢毅勇捷武之用也御器
以道則竒正威惠無所不逮矣御用以變則盈虛紆直
無所不計矣蓋古者愛其道而今也愛其器古者觀其
變而今也觀其用故文武之材比及於古者可多得若
能隨器而知道隨用而知變精儒墨者兼之以韜畧善
攻取者贊之以學術則將相之材去此焉往願陛下詳
而察之若陛下必擇狂夫之言愚納愚者之慮垂旒下
拱渴待忠讜則臣願以賢良方正能直言極諫科召赴

明試則賢良之科斯為具體夫賢者智之苑圃良者德之蹊徑方者慎履名教正者斥遠邪佞直言足以陳時弊極諫足以敷讜議時弊既陳則明於體用讜議既敷則造於教化明體用者宣味於六建達教化者宣徵於七德故臣之區區盡在于此惟陛下原缺二字所志辨而明之裁而擇之若陛下以枕石漱流為達則臣世居市井若陛下以金榜丹桂為材則臣未忝科第若陛下以鳩杖鮐背為德則臣始踰弱冠若陛下以荷戈控弦為勇則臣生本綿弱若陛下令臣待詔公車條問急政對揚紫宸指陳時事猶可與漢唐諸儒方轡並驅而較其先後矣伏願陛下念忠臣之後寬萬死之責召詣闕下令畢其辭退就鼎鑊死且無限于忤聖聽臣無任待罪戰汗惶懼之至臣某稽顙頓首死罪死罪

降聖節進奉狀

伏以真游降鑒誕啓於仙源令節凝祥茂宣於帝祉臣謬塵樞近叨奉恩榮慶東戶之期久披於丹質祝南山

之壽幸及於嘉辰載惟綏帶之微願續乾坤之德

進瑞稻圖狀

伏以嘉疏吐秀黔首告祥初擢一莖異劉欽之界內乍
分三穗疑蔡茂之夢中既介祉于清流爰考靈于瑞牒
此蓋尊位皇帝陛下四方無事萬國可封嘉雨霽乎仁
息陽春汎乎惠澤河圖洛書而並至元符黃瑞以偕臻
將讓德于岱宗致耀祥于嘉穀足使維揚昔日追媿魯
生南海遐方遙漸九熟未讓奇于合穎麥貽諄于兩岐
掩周祖之維糜陋漢宣之靈稷臣叨提郡印獲覩國祺
既當列狀以升聞敢不奉圖而稱獻天孫助祭願陪百皇
之禾清廟薦新敢繼神倉之穀

再進瑞稻圖狀

伏以一莖三穗已告靈休踰月再生益符馨烈祥經闕
載鴻策靡聞陋唐侯異畝之祥冠周室盈車之瑞此蓋
尊位皇帝陛下儀三五之景鏤憲八九之明光當時龍
半漢以爰飛致家穀歲穰而薦秀臣敢不重圖瑞穎再

貢丹墀願隨縮酒之茅廣備沉塗之禮

謝宣入院狀

右臣今日某日翰林待詔某至臣所居奉宣聖旨召臣
入院充學士者使軒條降恭被於褒言宸澤旁流擢升
於內禁循涯失措荷寵若驚伏念臣本乏異能仰逢昌
運先皇帝初臨軒陛首賜科名遂結綬於仕途俄濫中
於顯次本西垣更直叨預於司言內閣恭榮彌慙於備
問自爾踐更中外遷貿星霜出則分銅竹之符乏龔黃
優異之績入則游龍鳳之館非嚴禁侍從之才去歲以
式罷藩條歸朝法坐改畫省貳卿之列附神臯內史之權
輦轂密清蓋仰遵於聖訓條綱明具寔動稟於朝經僅
免曠官敢期進秩遽推恩於中旨俾厠職於內庭矧玉
府之近扃擬金鑿之真境論思為重或接於睿謀演潤
攸施式嚴於密命豈期孱昧可稱甄陞此蓋伏遇皇帝
陛下上智燭幽純仁求舊以臣一門遭遇荷異寵於累朝
念臣孤跡踐揚歷清塗於二紀特垂綸渥擢寘禁林謹

當仰副文明度修職業雖已臨於暮齒亦勉勵於瑣才
奉四禁之文謹裁於書詔循三輔之政用肅於都畿報
國是圖捐軀斯在

謝賜御書詩狀

右臣今月二十四日宣和門御閣蒙恩面賜臣御書侍
宴詩一首者宸極凝暉方恭於進牘奎躔分曜猥奉於
匪頌蹈躍相趨慶榮交極伏惟皇帝陛下文明繼志剛
健承天暢謨訓於七經精字書於八體每罷華光之講
即抽路扈之毫載揮魚網之綫屢竭金壺之墨翻回鸞
鵠盈溢縑緗言念侍臣曲紀龍潛之舊特推恩齊俾瞻
鶴企之蹤但傳世以寶藏固無階而報塞歡呼感抃倍
萬常鈞

謝賜馬狀

右臣今月某日右侍禁張永德到府伏蒙聖慈賜臣細
馬二匹者戰功未立蕃錫載加乘拜靡勝榮懼交集伏
念臣本微湊略誤委半符閑隴宿師賦發滋廣河湟伐

叛誅納尚微張無毫髮之勤稍增營塢之氣不圖使驛
輟賜乘黃事異仲都之能禮厚儀和之賚軍容增壯幕
府相趨此蓋伏遇皇帝陛下俯念舊臣久居邊瑣將安
戎役曲示春懷天廡分頒既誤及勞之典具裝是飭誓
先盡敵之行莫效銖分仰矚賞勸

乞修南京大內狀

右臣伏覩大中祥符七年二月一日赦勅節文應天府
陞為南京正殿以歸德為名臣到職後躬詣大內謹視
完竊其正南內門上有先朝題其榜曰重熙頒慶之門
樓皆損動其下只是依舊雙門未變列郡之制雖有兩
觀雉堞又無朵樓內城之中並無歸德之殿但是頽垣
茂草內有真宗皇帝御製御書南京頒駐蹕詩碑石一
片小屋遮蔽未嘗建立其東北隅小亭子一座內有先
皇御製御書駐蹕詩四首粉版門牖不嚴塵埃所闇臣
職在居守理合奏陳者伏以商丘仰當大火寶勢形勝
勝佳氣鬱蔥藝祖肇基之邦聖朝根本之地發祥薦祉

應天順人由七十里而興天乙是資於景毫累三十世
之王文昌始大於岐周用建名都寔陪上國與中天而
對峙企洛宅以相望至于官局廨居咸從改革而乃闕
廷宮掖悉未繕修漢啟南陽之都唐重北門之館並資
壯麗以示威神况茂陵之餘烈方宣真廟之鳴鑿未遠
必欲仰模太紫上憲甯取備九寢之儀敞千門之式慮
煩力役或費財征臣今乞依先朝勅旨只創歸德一殿
安駐蹕詩版又以宮室之儀門闈為重猶取諸侯之制
未成王者之都欲乞於南端闢正門三闔東西增朶樓
二座所貴庀工至鮮不日可成仍乞選差八作司臣寮
將帶工匠到此計度却於東京木場事造材植繫棧浮
汴赴當修蓋伏望聖慈特賜開可所貴宮闕之度稍合
於彝章祖始之基益隆於景命有光鴻祚永貴皇圖

王相公謝賜手詔狀

右臣伏以鳳蘊靈文方承於睿覽芝函密詔曲喻於慈
衷祇誦已還兢榮併集伏念臣素微材識竊慕希夷猥

奉綸言總讐金格嘗以三清真境宮室殊名六洞仙遊
羽儀異品雖沿波而粦見盡物本以兼該因寶藏之繼
觀有瓊編之斯在咸區分於部類可悉數於名稱紫府
絳臺臨文而備見雲裳藻衛伸紙以咸關爰奏御於穆
清用仰資於欽奉伏遇皇帝陛下祇膺道蔭昭事真源
遽班溫雅之辭俯示褒優之意華門輝耀永誓於寶藏
藥簡研畢更期於率勵荷照臨之莫報積感懼以增深

正旦賀皇太子牋

某叩頭言伏以緹管發春清臺啓曆舉椒觴而第頌爰
表著儀徇路鐸以宣風甫新元朔恭惟皇太子殿下明
誠淵塞粹性昭融趨帝室以問安隆天枝而繼體闡門
講學茂胄席之溫文祕錄儲休荷太霄之顧誕珍圖大
定景既日躋式膺獻歲之祥永固重離之祚某肅將明
命遠託倅車效秋實以無階望日圍而尚遠無任抃躍
歡呼之至以守官不獲稱慶宮庭謹奉牋陳賀以聞某
以懼以抃叩頭叩頭謹牋

生辰禮物啓

伏以函鍾紀律當炎景之宣威大昴儲精屬鉅賢之命世伏惟某官嘉猷濟俗懿業代工涓水凝祥早協佐姬之兆崧高發詠爰逢生甫之辰顧禋禘以非勤唯頌延而增懇有少微禮具如列牋

五月旦啓

伏以氣正南訛日躔東井當沐蘭於楚俗仍聚葉於周官伏惟某官任重麾旄功昭彛鼎達宏規於義府聳諒節於宗藩履此令辰倍臻休祉豈期台念先示鈞函感佩之私不任下懇

六月旦啓

伏以候格長羸氣當溽暑雨濯枝而泛灑螢化草以流輝伏惟某官金石存誠箕裘濟美荷封崇之茂寵宣保鄣之殊勲履此令辰倍臻嘉祐特承霽熒先示誨函感荷所深不任下懇

七月旦啓

伏以西顛司辰素商紀節湛清曦於鶉陸泣瑞露於仙
盤伏以某官寄重藩宣誠堅堽戴著撫封之令望揚分
閩之英風履此嘉辰別迎殊渥豈期台念先示鈞函感
愧所深伏增下懇

中書回夏州七月旦啓

伏以金方戒序夷則紀辰起越桂之淒風騰楚蘭之文
露伏惟大王忠規夙茂亮節允孚早膺祚王之封克奉
誓河之寵履茲令朔倍納清休豈謂鈞慈先貽台翰感
銘之至但初下情

八月旦啓二首

伏以律中南呂侯及西成漸鴻陸之未賓自雷門之奮
豫伏惟某官氣鍾間傑任重藩維藹銘鼎之世勲厚苴
茅之帝寵履茲今朔倍納休祥豈謂台慈先貽鈞翰感
佩之至伏切下情

伏以南呂還宮仲商紀度陟少明而夕月奏幽籥以迎
寒伏惟大王保塞誠戴君罄節仰奉文思之德茂昭忠

欽定四庫全書
卷十六
毅之規屆此令辰倍承嘉裕豈期台念先枉鈞函媿佩
之私不任下懇

九月旦啓三首

伏以肅霜紀候清日揚輝澄楚潦之餘波發豐鍾之逸
韻伏惟某官忠純挺操屏翰宣威克揚固圉之勞上奉
同文之化屆茲令朔倍納殊祥

伏以肅霜戒候采菊在辰築場圃以務藏飭衣裳而維
剛伏惟大王書忠甲令襲寵和門克彰濟美之規久奉
撫封之寄屬茲告朔諒集維祥豈謂台慈先垂鈞翰鏤
銘之至不任下情

伏以肅霜在候無射屆辰禮聞習吹之儀詩著授衣之
詠伏惟某官真純秉節英勇傳家鏤勲業於景鍾載忠
規於甲令屆茲吉朔並迓殊祥豈謂台慈遠貽鈞翰其
於佩服不任下情

十月旦啓

伏以候屆寒英日躔天駟謹澤漁而登賦設朋酒以休

欽定四庫全書
卷十六
農伏惟某官位冠齊壇威宣漢塞仰奉重熙之運載彰
式遏之功履此令辰倍膺殊祉

賀冬啓

伏以日在建星斗連營室開漢門而候景登魯觀以書
雲伏惟大王韡韡凝華振振著信茂奉親辰之德永膺
分物之封履此令辰倍延休祉

代僕射相公賀冬啓

伏以建星底日伯趙司辰發黃鍾初九之聲孕太極函
三之氣伏惟大王分輝帝室流譽咸藩早膺選德之封
茂奉睦親之化履茲令序倍納殊休

代集賢賀正啓

伏以黃鍾紀律伯趙司辰紀雲物於魯臺奏版書於漢
殿伏惟大王雍和著譽信厚流徽早䟽四履之封茂著
二南之德履茲令序倍納殊休

欽定四庫全書

文莊集卷十七

宋夏竦撰

啟

賀樞密相公啟

伏審欽膺恩制榮踐鈞樞天下幸甚恭以某官六學宣
精三英毓德鍾半千之運為帝者之阿衡著畫一之規
作海內之明表而自弼諧先聖啟迪嘉謨甄別九流裁
成庶務允屬繼明之治愈隆圖任之恩總日月之畿坐

欽定四庫全書
卷十七
康雅俗治金刀之府釐定舊章因是正位巖廊延暉台
極來遠獨陳於大計懷柔允贊於聖功洎申伯於宣藩
國暫鈞於德澤而王商直相戎夷彌憚於威名一昨法
御朝直靈區展案亟入司於留籥寔簡自於帝心果協
剛辰誕膺明命正樞庭之重任兼鼎席之崇資延登而
體貌特隆詠頌而品流交慶某自陳席幕曲荷陶鎔限
從朝倫闕司奏記積歡心而曼異屬微疹之方嬰肩輿
已及於東平力疾將趨於北闕瞻望抃躍實倍常鈞

賀樞密尚書啟

伏以朝廷巡祭於后祇嚴配於神壤惠加無際慶洽有
生飲至辨儀既行清廟疇庸命爵首拜元臣凡受甄陶
罔不欣抃伏惟慶慰恭以吏部天官周禮謂之太宰尚
書古職虞典寔日納言漢儀首冠於列曹魏制統司於
選職大則綜理庶政次則品擇九流世獎茂勲代無虛
授伏况國家崇端右之職湏經遠之材簡銓筦而正司
率宰衡之兼總以是望高台鉉任重名器為一人乃睠

之資作九服具瞻之地豈止聯曹建禮奏事明光象北
斗之樞儀總南宮之喉舌伏惟某官允釐帝載敷道化
源左雄奏章動為故事唐約表疏出自手書郭賀仁明
子魚清淨議事務從於寬大臨下盡削於煩苛天光自
比其丹青蜀劔豈方其明達萬事不理誰廢胡廣之歌
三讓彌高屢下鄧彪之詔惠加含卹道服措紳授符則
戎后款關借箸則羌豪厥角四方無事萬國可封輔成
垂拱之功肇建東巡之議司先置則瑞芝蠶涌紀鴻猷
則麗藻金相暨汾水頌祇扈鸞旂於馳道神光燭夜奉
龍袞於方壇禮備元黃功高鍾鼎以是職彌崇於四輔
官獨守於六卿偉齊以僕射兼司平叔以侍中并領比
之聖日難望清塵然而晉寵茂先尚開五府軒崇風后
合冠三階冕旒注意以非常珪組傾心而久待某棲投
可素欣幸最深其如四海無親三台寡援生成有路只
期文命之昌言薦進非材敢望巨源之密啟

賀樞密尚書啟

伏審祇奉制恩入長樞府伏惟歡慶恭以某官懿文偉望俊德端成常袞為當世才臣魏相練本朝故事告徽宰府克懋贊襄之勞賦政別京洽著保釐之績會朔方之奸命虛漢幄以須材尺詔亟頒追車肆覲延英入閣特從雙日而開上兵伐謀升總萬幾之祕圖任之恩惟舊幅員之係胥同某出自恩門適居塞屏瞻泰符而在遠趨翹館以未期下情無任依投欣抃之至

賀樞密副使啟

伏審欽奉茂恩榮參密命伏惟慶慰伏以某官豐規粹遠明識周通緬油博達於文經玉帳翼高於武略肇修邊好當資出境之材繼總戎昭允奉撫封之寄勲庸克著望實彌優果膺丹宸之東求入贊鴻樞之獻納載隆命數允副僉諧某素仰聲猷方增慰懌重荷緘封之禮過形撓抑之辭感佩銘藏不任下懇

賀高樞使啟

伏審祇膺冊命就陟樞庭恩出主知事榮物聽恭以某

欽定四庫全書
卷十七
官器涵剛寔才貫幾深秉忠誠之心一出誠明之正性
旦暮聖辰之會翱翔朝弁之華寢竭猷為益隆體貌鴻
樞之柄專掌於繁機英衮之司行光於寵拜畢大臣之
能事允率土之具瞻某職貳侯封迹遙台座無階慶蹈
有地埏鎔

賀西樞相公生日啟

伏以函鍾統律方熾於陽暉崧岳降神載生於英哲伏
惟某官豐規茂粹懿德冲明獻納嘉猷翊宣大政左珮
紀慶爰偶於誕辰厥篚修誠敢陳於善祝有少微禮具
如別牋

賀參政給事啟

右某啟伏審祇奉制恩榮陪宰府伏惟慶慰恭惟參政
穹高生德嶽鎮降靈服百行以麤躬通三才之懿學矧
自便蕃鼇禁尹定神臯時厥中庸略去苛細詳言照理
世咨其清端心在公帝諒其節庶績思又景命方初官
惟其人政將安往果峻瑣闈之秩式均鼎鉉之尊公枳

是維國柄攸屬任隗之見重於世楊綰之自化於人凡
在有知孰不載躍某早游恩館幸託鴻鈞歡欣所深聳
忭無已

賀內翰劉給事啓

右某啓伏以祗奉寵召勸講宸闈伏惟懽慶恭以其官
道冠九流識包三極闢先儒之塞路首映人師適列辟
之舊章寅禪治體外內之猷畢告天人之爵俱隆矧自
引避當途鎮臨巨屏沈規粹範泯崖略於天和鯁議純
誠留矩模於邦直高風益飭清望攸歸果當續服之初
顯副優賢之命丹書訪道禮厚於周臣重席談經事隆
於漢會繫茲舊德翊乃聖謨咫尺威顏世逮光華之對
丹青神化佇宣台極之暉凡在有知罔不翹首某幸窺
邸報方遠師門忭躍之誠等夷增倍

荆南府知府學士李給事啓

右某啓早由踈隘獲筮凝巖官修之業無聞天覆之恩
未報因代親有請爰昧死以陳章冒禁成愆免官出

守山藪藏疾荷先聖之哀矜豺虎食讒仰至明之末減
四移使竹六變年灰貌是零丁宜夫湮沒某官觀仁以
過棲愛於情目督井以拯沈馳飛郵而剡奏抵排羣議
申證非辜謂其夙侍清光少知於治體嘗司洪誥多識
於訓辭高議霜明至言金重倬為外舉足感上心而安
國之灰久寒從茲起焰虞翻之骨非媚憲玷知言佩服
所深敷陳罕既

賀司徒侍中啓

某啟伏審欽膺朝冊增寵正司天下幸甚恭以某官崧
極儲靈穹高格業任隗沈正鯁議不回山甫將明庶邦
是式而自惟新大政首幹鴻樞三后在天仰當於顧諟
七月同軌寅奉於寢園送往惟憂勞還甫渥遽刊章而
避寵示挹道以敷風興讓官師益厚忠淳之俗推恩師
傅更隆尊尚之儀果反剛辰聿嚴厚禮廣真封於食采
增崇號以褒功誕告外庭布昭盛德凝和寶鉉發景乾
台萬樞藹其休聲六幕翔於善氣懷生之品載躍攸同

某出自恩門久繫餘照欽聞明命增抃卑衷伏恨條職
所拘不獲躬安白屏某無任欣榮激切依歸之至

賀王清承旨左丞學士啟

右某啟伏審華園勸講奉咫尺之威顏曲密侍祠貳熒
煌之台座仰聆恩制伏積欣榮恭以某官峻極降神穹
高生德探二儀之奧祕游六藝之粹精而况內天外人
含華隱曜方圓詎表其際榮悴靡槩於懷鑒達萬情塵
光羣累一言不立澄寶海以皆空兩半同陞游玉池而
甚樂天和益茂心照逾清允副旁求仰禋初載宸帷詢
訪靖館齋嚴荷慶於需恩式陪於鼎輔暫階隆罷行陟
近司凡在有生罔不延首某自貽痕玷仰誤品題久困
泥塵闕通牋記右臂為殫方欣鷄炙之求良冶鑄金敢
有莫邪之請門闌尚阻夢寤勞聞命欣愉倍百倫等

賀晏內翰除景靈宮副使啟

右某伏審祇奉恩俞榮加命秩伏惟慶慰恭以某官氣
鍾辰律識貫天淵秉亮節以光朝鼓英辭而高世夙昭

賢業茂著師規慎基命之惟新罄訂謨而入告周旋三
接導筆舌於天常申勅萬幾諧笙簧於帝典鴻猷灼叙
羣品推高果由巖近之司更益便蕃之數開榮瑣闥克
重於官聯作貳殊庭載光於使範紳綏動色竹素楊芳
寔乃眷之是膺俾斯文而有屬當陽圖舊已旌朱邸之
賢絕席奮庸焉避黑頭之拜恭承嘉會超絕前聞某屏
去周行外司漢竹慶登庸之有命悵申禮以無階仰繫
門闈豈任飛越伏悵條職所拘不獲躬詣台屏某無任
欣躍依歸激切之至

賀轉運啓

右某伏審祗膺中詔顯領外臺伏惟歡慶恭以某官學
術粹精風猷凝峙不侮不畏式是古人以猛以寬濟乎
中道獨出羣公之右允當上帝之心引職憲牀杭稜使
斧濱江而北籠貨至饒無刺百城聿當一面方欽聞於
調發矧物集於京抵風音所傳歡愉交集某幸司符竹切
仰瞻帷獲在恩庥但深跋躍

賀轉運啟

右某伏審密命蕃恩外臺專領仰要司之簡拔寔衆志
之歡愉恭惟某官清懿飾躬通闕廸望并包淑哲邁遇
光華資榮近以久降副僉擇而此厚糾繩康俗適著於
聲猷餽給富邦暫迂其毅斷即聆高最越在親嚴諒伊
遐邇之懷併是瞻祈之切某微姿極下大庇方依戀幸
彌深志銘無既

賀屯田啟

伏以屯田博達文心詳明治體擯桑孔之術不議貨財
斤申韓之談專諳仁義近徇常牒出倅盛藩蘭桂之芬
振揚已遠牛鼎之器甄擢匪遙惟善順於天和佇大光
於朝議傾依所至願頌尤深

賀舒州李相公啟

右某伏審肅膺鴻沛起殿大藩伏惟慶慰恭以某官沈
正秉彛清和懿德經三聖之變紬繹惟深貫萬物之儀
臣隣有翼曩屬先朝違豫臣黨興姦密嘯羣邪陰窺時

柄允繫哲輔克殄凶謀防檢未萌澄綜多辟虹氣由是
霽止霄塗為之密清精貫三辰賴深百辟終以狎聞蜚
語引去上司傳致深文越處南裔孤節彌諒高揖自冲
處榮悴之久人言無間失左右之手國體幾虧大號繼
明巨慝咸露狐鼠失其深穴豺虎食於諧人協氣雲翔
皇明電照澄洗司制延即舊臣眷惟贊之賢首被優深
之渥慰藉良厚毗倚增隆袁安涕洟念深於王室謝傳
憂樂望結於蒼生雖暫假於鎮臨必坐階於密勿至公
來復有識相歡薦紳傾耳以聆風斯文聯冊而刊美洪
惟高範絕出常鈞某恪守郡條欽聞朝渙不獲拜伏車
下奔走道周但私慶於單危將永歸於挺鑄

壽州相公啟

右某伏念閩外之邦宜嚴所守弗當便道增仰貴台託
身塊北之鈞早繫大庇之託熒煌之坐合勤彝儀恭惟
某官純槩光朝大猷稽古河帶山礪預忝藏府之盟蕭
規曹隨筆冠宗臣之列席西朝之綈賞四海之具瞻

復暫避繁機出臨巨屏長城萬里固蒙福於靈河華闕
九重率乃心於王室疇庸方切圖任有歸佇再正於洪
區永增輝於盛旦空踈之迹終始是依某無任依棲禱
頌激切之至

潭州李兵部啟

右某啟伏念某屢竊虎符甚安鳩拙不當便道絕款緒
風逝望朝髦曼分霄堦地頗賒於河潤心但切於旌搖
恭以某官直道在公懿文飾政入端朝著羣公讓於茵
憑出總使條舞吏空其囊橐逋民咸復美化大敷然自
郡本股肱召莫先於季布治繫寬猛政焉避於國僑傾
聽旁求用紓勞想炎涼改侯葆嗇是宜頌咏之私不任
丹懇

賀薛侍制知開封府啟

右某伏審祇奉制恩榮蒞天邑伏惟慶慰恭以某官宏
猷體遠精識鈞深嘉言奮乎黈聰懿文縉乎邦憲而自
宸帷訪逮計省踐揚瑞鳳覽暉儀鴻筵羽體貌之榮雖

渥彌綸之業未宣乃眷浩穰遂茲尹正羣玉上帝之府
克峻於官聯太微三光之庭茂延於晝接式夫古訓時
厥大中前趙後王方仰追於懿範左輔右弼好協贊於
訏謨遊東惟新游談胥慶某出麾外服遐抃吉音燕厦
莫趨鳧藻增躍

正旦賀內翰啟

右某伏以書得夏時標物生之令候星回呂紀在歲始
之常經恭惟某官履道淵冲炳文宏博總直轡以高蹈
擁大璫而遠遊通內相叅決之謀進扶鴻業代主上深
厚之訓輝映前圖企聽簡良居承弼化率是海隅之衆盡
調鼎寔之和伏想贊翊循經練願多暇履茲初曆倍納
蕃禧某早飾冗才叨偕巨庇祝頌斯厚敷述奚殫

賀冬至啟

右某啟伏以南至啓辰聯星貫厯闔漢門而候景登魯
觀以書雲恭惟某官文武兼資勲賢莫貳仰鍾河嶽之
瑞聿膺夢卜之求德冠生民道高羣后宗祊倚重方宣

可大之功海域具瞻皆慶履長之祝某式提誦戍久累
洪鈞阻陪介壽之班唯積戀軒之感依投繫仰倍萬品
流

問侯太傅啟

自間風規屢移年籥忽奔雲之翰彌縈搖旆之心伏惟
某官懿德遠聞芳猷夙茂紙弓白羽妙絕於等倫玉帳
絳宮精通於機會佇奉戎昭之寄式彰勇冠之材六戀
方馳清談尚阻惟希冲養以副願懷

問侯尚書啟

近拜郵書仰通鈴閣遽承鈞誨寔聳朝榮獎飾有加銘
箴罔喻恭以尚書浚明著德魚亮成規四方於宣允叶
維周之詠萬邦為憲方歌受祉之詩佇正位於近司永
流徽於民表伏異為國自愛副民具瞻某早荷重知誤
攀多士衡舊恩而莫報懷深頌以徒增棲倚之誠倍百
常品

省副郎中啟

右某伏以三陽之律初宣式新庶彙一歲之端肇正爰著前經恭惟某官妙味宅心懿文秉德越丁復旦潔履仕途計部贊規克謹牢籠之典丹墀詔爵即膺近密之資方屬令辰諒延殊祉某夙叨齒記但積瞻依

回雄州館使太保啟

屢馳丹懇仰瀆清輝遽捧報章寔銘懿念伏惟某官書忠甲令紀績太常已久肅於邊庭行入恭於樞府方新歲律更順天和願頌之懷倍百常品

免奉使啟

比膺使指往奉歡盟選授至艱道塗差近况多侑幣寔濟空拳然念頃歲先人沒於行陣春初母氏始棄孤遺義不戴天難下單于之拜哀深陟屺忍聞禁休之音車府露章槐庭泣血王姬築館接仇之禮既嫌曾子回車勝母之游遂輟荷兩宮之大庇載三事之昌言退安四壁之貧如獲萬金之賜某官力持名教數獎孤寒屬商利於摘山闕言心於奏記何圖驛置先隆書筠俯哀蹈

義之心不辱資忠之訓永唯佩服何但銘箴卑情不任
感咽依歸之至

欽定四庫全書

文莊集卷十八

啟

謝授知制誥啟

宋 夏竦 撰

蒙恩特授前件官充職者紫微祕掖塵書命之司丹屏
儀曹叨奏疏之任尚兼載筆仍贊殊庭恩獎有加心顏
無措此蓋某官蚤垂顏采曲借光儀是致鴻鈞誤甄微
物矧著龜先見嘗昭示於前期松栢後彫忽遠流於滌

問夫何後進辱此重知顧報遇而未由但銜恩而有素
區區之懇莫喻萬分

謝起復授知制誥啟

伏奉制命前件官陳避不允者靡依茹痛瞻風木以隕
心圖舊延慈俾墨衰而從政未能毀滅惟切震惶竊念
其本以諸生嘗階近侍如絃謬直伺免甚愚爰六剖於
銅符遽九遷於圭籥采蘭就養解綬而彌遑陟此銜哀
號天而罔續式遵治命歸塋近畿宅兆未安杯圈如在
豈謂誤傳詔版許復故棲三歲免懷乞終於喪紀兩宮
愛下莫寢於徽章強整殘軀再司舊物此蓋某官薦延
有素保宥特深致滋放浪之蹤薦游清切之禁懷鈇久
廢但重學於畫脂弄杼非工敢更言於織素唯期盡瘁
少謝生成早情不任感媿哀咽之至

謝某官啟

祇荷寵光不任榮懼伏念某器能無算材識非竒幸際
會於昌辰亟忝塵於近列徒更寄任莫著聲猷竊位樞

連詎彌綸於密命備負鼎席莫寅亮於大謨此者伏遇
國家欽奉真游誕均蕃錫加勲臣之美號進公府之崇
資兼益戶封愈隆命數循涯多媿敢忘周任之言味進
誠難亟效范宣之讓雖削章之繼上顧出綽之已行但
知受以周章固退思而恤墨此蓋某官因承清晏曲借
餘輝致此庸虛荐承優渥敢不盡瘁事國少遜濡味之
譏夙夜在公更竭負山之力感銘之至不任下懷

謝大王啟

叨膺恩制載錫徽章祇受以還兢惶靡措伏念某遭逢
運會忝冒官常自膺圖任之私莫著謨明之效昨者國
家欽承真御逖諭鴻源範肖象以惟寅建殊庭而有翼
豈謂具臣之幸特膺置使之榮仍益爰田尤彰異數顧
滿盈而是惧寔避讓而靡諧叨據踰深周章喻罔此蓋
大王嘗因密侍夙借公言致曲荷於寵靈惟仰銜於殊
造永言愧佩但切丹衷

南京到任謝二府啟

仰承獎擢伏積兢榮切念某本寔庸人妄干榮進早緣
誤寵亦玷近司上賴保全獲均勞逸一昨東秦閔雨下
戶將饑猥奉詔函就分使竹殊昧救寧之理莫寬旰昃
之憂事雖欲於防虞言或多於過切當朝廷責寔之際
固巖廊精治之辰襍被自隨屏居是分豈謂伏遇某官
俯矜舊物深屈至公仰贊恩章俾矐留府典銅魚之宮
鑄合銀免之軍符周微子之封圻漢鄼侯之寄任載惟
蹇短曷副坵陶惟更勵於駕材用少酬於元化感慚刻
著倍百常鈞

永興謝二府啟

出自坵陶伏深感戀竊念某人品駕下世胄孤平繼典
九城荐更三紀無一毫之可錄悵十駕之空勞嚮者名
自別都俾司會府服勤徒切析利非精矧視事之辰便
主摘山之議逮成奏格幾汗簡書爰以細札垂文陽郊
錯事恭壇備物方畏凜官齋幄還衡甫寧悖魄攝頊稍
逸垂翅將安彌仰恃於哀矜冀且參於下吏豈謂伏遇

其官因陪漏刻誤憶姓名議四鄙之羽書按東曹之邊
瑣拔於端右付以戎昭六蠹啟行光華籍甚萬錢賦祿
訾計差溫中外誚其何功文武譏其不次載惟求舊深
累至公敢不更勵忠規上酬元化滅烽末日既恥於家
為數級有時或期於天幸指玉闥而非遠瞻鉉府以方
遙媿荷依投萬倍倫等

授宣徽使謝二府啟

右某蒙恩特授前件官者元化均分近司進拜殆非功
次有誤寵章伏念某偶以孤生謬緣薄拔攀仕途者四
十載竊民政者十五城而况兼護將屯帳絕絃之未遂
創圖羗事慚唾掌以難裁猥陞四貴之華頗玷十連之
長人譏多幸自訟何勞此盖伏遇某官登翼大猷矜嗟
舊物量衆恩於邊瑣較前職於省闈昭衡石之至平灑
霖雨之餘潤萬金屢費適寬責師之文十使兼加方切
推兗之效敢不益張晴瞻更厲偏裨庶集羣勞仰酬
治

永興再任謝二府啟

右某蒙恩授前件職并知永興軍府到任上訖出自坯
陶伏增感惧竊念某頃嘗佔畢素不知兵特假幢麾比
長関中之戍親臨矢石俄為隴上之行徒肄業於幡矛
罔追功於橫草猥荷向隅之愍犹書守塞之勞箕頽與
區方膺於外徙河潼右壤亟復於故棲寔總攝於百城
且并護於諸道金印駢組盡兼數使之名玉帳建牙爰
當上將之任倚辦尤重堪副誠難此盖伏遇某官登翼
皇猷布昭元化圖殪目中之敵先增圍外之權首念樸
忠驟加寵數既騰譏於帥賤將責效於除^功敢不祗慎戎
昭恪遵廟畧武暢西海儻橫厲之有成生入玉関固哀
憐之是望永言報塞敢憚勤勞

并州謝二府啟

右某蒙恩西陲用武寸效曾無北道乏人僉謀猥及負
責斯重戴^恩則深咽喉要衝股肱舊地旁連馬邑直控鴈
門周宣中興茲嘗薄代漢武懷遠此為觀兵屹然形勝

之區紛爾轉鬪之地思德良士倚為大藩某素無兼才
暗於臨事精誠內耗齒髮久衰上馬據鞍雖自矜於嬰
鑠登車攬轡尚有志於澄清然孤蹇多艱功名難偶事
方創置謗輒隨生孤根易搖衆口難辨指嘗戾臂志不
酬心尚賴丹宸至明黃閣垂庇曲藏痕玷勤賜保全勉
策暮年俾圖後効孟明屢辱定收三戰之功孫臏何堪
終期萬弩之發

回謝二府啟

幸會昌辰誤塵近列仰荷同寅之德唯增有覲之暫豈
謂鈞慈曲記生日俯垂榮海誨形厚意以居多仰佩殊
私鏤丹誠而增切所貽盛禮焉敢克當

涇州謝二府啟

仰戴圜鎔寔難堪副伏念某本由寒進妄齒清流三品
崇高屢更放都座十城固養遽剖旌軍符未嘗練達兵
鈴習知戎警猥奉臨涇之後敢辭負羽之行漢惟六郡
之雄唐兼四鎮之重宜得飛將倚為長城豈謂伏遇某

官登翼大猷斟酌元化曲矜嗟於舊物特選補於邊屯
仍加置於使聯俾專司於武旅望巖塗而馳戀撫駢組
以知容惧上累於甄陞益俯加於策勵兼程赴治周覽
根心顧接雉之未完且租更之甚闕塗烟在望固知西
鄙之咽喉榮壁空存無復北庭之組練願更寬於轡策
庶漸葺於封陞愧荷依投倍百綸等

謝魏閣使啟

伏以太尉先令公雖嵩宅粹間氣凝祥媯汭降嬪極三
朝之眷待台槐襲慶陟四近之尊崇功在旂常政傳謠
頌仰圖英烈允屬鴻儒豈為某官特示哀誠見求鄙製
雖早承知獎備鑿於音徽而載罄庸虛莫周於事寔緝
粹音而僅就鏤翠琬以為慚敢冀仁明過垂恕察兢灼
之至不任下情謹齊沐譔成先令公墓誌銘一首隨狀
呈納

謝叅政啟

昨以總司帑藏認纂網條洎參校於權衡竄審詳於鈞

石豈謂鴻私曲被優詔荐頒將並刻於堅珉庶永傳於
內府恭以某官豐規冠世明識過人幸久荷於殊私遂
仰塵於英聽遽示緘封之禮載形獎與之辭况近列之
至崇辱前銜之過重但銘藏之增切顧當捧以尤難悚
惕之誠倍百倫品

謝西京藏書啓

伏以尚書懿文雅正妙識融明避中鉉之鈞衡奉西都
之筦籥惟保釐之允迪固樂只之攸宜方企旆旌遽承
簡翰玉音無斁式慰於深心鼎席荐陞佇光於善頌傾
思銘佩文不盡言

回大王啓

幸鍾運會誤玷台衡屬當生育之期方積劬勞之感猥
蒙鈞念曲示誨函仰承仁厚之私俯集媿銘之素所頌
盛禮安敢克當

上親王啓

某啓幸會熙明叨塵機近揣分深慙於昧進依仁寔賴

於同寅式當生育之期方積劬勞之感敢鈞造期特賜
榮緘荷眷與以尤深積銘藏而莫喻所貽厚禮焉敢克
當

謝樞密相公生辰啓

本以非才幸逢嘉會莫著謨明之效但貽昧進之訛豈
謂鈞慈俯記生日降緘勝之榮問示筐篚之厚議載揣
庸微固難當受感銘之至不任下情

謝宰臣惠食物啓

伏奉殊恩俯頒異味仰惟顧錄蓋不遑寧伏念某冒緒
寒微學識蒙闇無近親可以仰給無先疇可以躬耕幸
依賴於門闈得叨塵於官序西崑抱槧遽獲於依仁東
閣食仍容於庇族曾無鳴盜之淺術徒恃簪履之舊恩
思時奉光儀特惠顏色掩愚陋之累聳殊尤之觀復念
食貧深矜分薄屢垂賑濟俾育孤遺當雨雪之即零知
藜藿之不給載形軫卹輟賜饌羞食五侯之鯖魚慙上
客持左手之蟹寧媿昔賢顧舉族以分甘念何門而展

効心同白水期誓節以無渝命等鴻毛異疇恩而有所
退量微忝唯切戰兢

回學士啓

遠承尺牘兼示青編究作者之楷模振古人之風烈况
斯文方盛公議有歸佇膺前席之求幸息沉僚之嘆感
銘所至願頌良多

回謝學士啓

伏審光奉茂恩榮膺寵數伏惟某官豐規茂粹雅度淹
通龜紫傳家允叶芝蘭之譽鱣緇逮志克彰黼藻之文
而自射鵰飛英術標擅譽遽升榮於匠署仍闕掌於郡
條大宣五袴之謠爰上三年之計果試言於宰府亟引
籍於朝闈石室討論閱緹油之祕邃蘭臺著譔懸茜綬
之光華彌著清徽允符公議某正深慰懌忽奉緘騰載
闕雅麗之辭唯積規銘之素

西京留臺謝少卿啟

向者令嗣還臺榮緘垂問屬常居於賜告遂久闕於報

車延企清徽但深遐想近審蓬丘進秩示獎於耆儒梓
府分曹尚優於冲攝諒惟褒命彌聳高風尚遠披承更
希遵愛

回徐舍人啟

其聞太一三光之庭仰昭於天象內史八枋之法寔掌
於王言聳禁近之榮階極斯文之盛選欽承茂德允謂當
仁恭惟某官風格粹和識度彌遠懿行推於倫黨奧學
本乎宗師書觀縻賢盛有滯留之嘆官曹率職累更

繁鞅之勤環望流聞泐表妙簡亟試才於槐府俄錫命
於綸垣景祚增光有識交慶固將辭成楚寶體變漢風
斧藻凝猷鼓動中和之氣羽儀嚴侍翕彰竒異之能忝
預朋從忻聆進擢結綬甫陪於適躅披騰遽沐於芳戩
恭窺辨鹿之功益仰謙虛之美其於佩服罔罄敷宣

漢東太守司封啟

某頓首頃歲從莊穆靈駕嘗傾蓋滎陽道中二十稔矣
比者謫官江濱久陪隣好過客翩翩未嘗不沐虛獎尋

屬使節東築剡水大門荒阡特蒙增殖松楸今已成林
其為恩舊若此而疊委公函遽茲相外豈以後進驕氣
未祛是將待小子於名利之交歟幸緣雅素改賜手誨
庶依仰之有地新葺已拜受訖還源觀文敢冀垂借今
附雲峯二詔聊飲從者流暉電激塵事蠶午其限守半
章阻越宴坐不勝瞻望感戀之至

集賢相公辭官啟

伏奉制恩併加命數載循忝冒寔積兢惶伏念某惟識
顛蒙聲稱淺昧幸遭逢於期會叨踐歷於官常遽塵樞
要之司亟豫台衡之任循名責寔曾無致遠之能具位
妨賢深負食浮之愧比者伏遇國家欽承天命茂對僊
游昭積累之鴻源顯顧諟之景祐式均大慶首及近司
進執壁之崇階正躍池之竣秩仍益爰田之賦兼增具
食之封受寵若驚顧何功而可報知止不殆將昧進以
尤難已瀝寸誠虔通勅奏願寢既行之命庶寬若屬之
憂伏望某官俯諒曲衷特矜非據因從容於晝接為啟

迪於昌言儻罷命書永銜恩造

東樞太尉相公辭官上大王啟

伏奉制恩併加命數揣循非據啟處不遑伏念某罷識
 甚微聲猷素昧遭逢朝會忝冒官常不白淺之司固慚
 於潤色奉彌綸之議莫効於將明荐膺加等之恩亟列
 秉鈞之任雖思退食益媿妨賢此者伏遇國家至德符
 通真游昭假茂對式均於純錫誕敷首被於寵先進掌
 武之崇資褒功之懿號仍加并賦兼益真封雖堂陞之
 務隆示褒優而過分顧斗筭而易滿惧顛躋以貽憂已
 恭拜於囊封乞追還於詔命伏望大王俯矜短拙用軫
 恇忪因入覲於凝嚴為特申於敷奏儻諧誠請永荷恩
 私

僕射相公辭官啟

大慶方均鴻恩曲被省循非據啟處無從伏念某罷識
 顛蒙聲猷淺昧從政乏靖恭之譽代言無雅奧之辭徒
 以幸會休明誤膺眷獎亟正台衡之任荐塵揆路之資

維石巖巖莫允具瞻之望代檀坎坎甚詔素食之譏此
者伏遇國家道化休明聖風醇暢感真游之報降諭仙
緒之綿長欽修茂對之儀誕受聿懷之福式覃異渥首
及近司瓊闈分曹荷寵章之至重琳宮置使奉明命以
惟新仍加數於爰田兼益封於真食踰涯既極昧進誠
難苟竊祿以無厭必曠官而負媿已陳奏牘願寢出綸
伏望某官曲諒庸虛深矜悃悞因入趨於三接垂時達
於一言冀收渙汗之思用息怔忡之懇

辭宮上大王相公啟

固避思私未俞誠請省循過分隕越無從伏念某本以
遭逢獲諧幾近戍亭輟警曾微借箸之勤武帳承顏空
備影纓之列每奉承於成算動遵守於舊章但敷臣子
之常規無益朝廷之大政歲月滋久尸素居多深懷昧
進之憂將避妨賢之路豈謂寵靈荐降命數尤崇令備
職於彌綸復正名於宥密揣躬內訟惧貽覆餗之虞瀝
懇露章願寢出綸之命葵心雖切天聽未迴已再黷於

凝嚴期特收於渙汗佇聞得請用息端憂伏望某官特
諒曲衷俯矜非據因奉清閑之宴為陳特達之言僥罷
近恩永銜殊造

僕射相公謝授官啟

降成命於慶霄靡容辭避集殊榮於瑣質但切兢惶伏
念某幸會聖明叨承天寵之胡廣中庸之與昧孔光周
慎之規四海同文莫借籌於武帳萬錢受俸徒充位於
巖廊此者伏遇國家欽奉真游誕昭仙緒式均茂渥首
及具臣進秩黃樞寔正秉鈞之任列司恭館肇膺置使
之榮復加數於爰田仍益封於真寔寵章彌峻輿議謂
何深愧曠虛之職獲叨進陟之榮感愧彌增敷叙奚恚

欽定四庫全書

文莊集卷十九

書

宋夏竦撰

上巡撫使裴司封書

右伏以國家幅員億萬廢古封建州縣之治責在庶官
用一賢則數十百里有受其賜者用一不肖則數千萬
屋有當其暴者故朝廷年間屢下詔書切責所在長吏
察舉良士而史道益襍賢者益寡不肖者愈衆其故何

哉蓋薦舉之官因思沮勸事有驅走暴露艱險利弊無功而多過者非清苦勤謹則不用也事有宴安溫潤平易整葺無咎而多譽者非親舊暱幸則不用也皆謂公舉受賞不若私舉受罰故舉制益難而舉狀益謬情害於道可勝紀哉使忠信者惕惕自晦什處伍列但以道俟人人不知則俟他人他人不知則復俟他人終不敢心腹肝胆從人以求知也浙江東西地長千里亦有退伏兢慄茹蔬飲水以待人者待之不得則復待之復待之不得則有中夜而起望象魏而北嘆思得賢使者觀省南夏按察良苦無何精誠所感陰陽有開果遇執事擁傳東下諭朝廷之意勞問高年疎決囚繫士之有所待者皆歌忭相慶如早穎焦枯而甘雨垂降誠以執事豁達正直蹇諤剛毅為國家諫諍之冠冕為蒼生號訴之梯石終不忍使可以鎔鑄翦拂者沉滯於下位然則執事慰于者壽不如退一貪殘減萬笞杖不如進一賢才貪殘退則民不待慰而自安矣賢才進則刑不待減

而自省矣貪退賢進民安刑省則執事之功可與太平
無為者相上下豈當與錢穀鹽鐵之官較輕重哉某丹
陽一掌版籍吏耳自幼及長聞執事之風恨不能執羈
勒於門下以滿夙昔之願今執事揄揚明天子之德慰
勞吳會之民故敢竭思慮冒罪憲少布腹心於左右惟
執事者裁念之若令諸有待者不復於他人則某之區
區百世幸甚某再拜

上兩浙運使姚鉉書

伏以國家之制內外分職內則中書以發號令樞密以
掌兵政三司以計國用外則輸運之司使領方面其職
有六其政有五糾姦慝明簡稽察利害平莞推通商賈
重廢置之謂六職舉賢使能報功卹刑愛民之謂五政
六職修則國必豐其財五政舉則官皆稱其職豐財則
無重斂稱職則無弊事然則六職之要在乎糾姦慝五
政之大在乎舉賢能何則若執事之麾下地長千餘里
官不啻數十百員人心如面罔或純一貪夫徇利皆曰

上官煩劇不暇按省故安於懈惰嗜於賕賂以浼執事
執事固知而罪之則為惡者沮矣庸吏砥節皆曰上官
明允有能必舉故服於勤恪甘於冰蘖以待執事執事
固知而賞之則為善者勸矣然則多糾惡不如多舉賢
傳曰禹稱善人不善遠矣其是之謂歟故某之有待於
執事也非一朝一夕矣某本無他材癖視嗜儒學雖不
得經指而頗知戒訓居貧而固節其臨事而專其守勾乙
案籍之暇則伏讀先王之書日飯寒蔬數十本若牲牢

水陸之味而又侑之以鐘鼓歲服敗綈數千縷若衣文
繡紈綺之裳而又映之以珩珮非不知富貴之可悅貧
賤之可厭也蓋富而憂不若貧而樂者也嘗念事父之
日食飫饘藿衣繒厚絮無何近丁家禍墮於徒勞縣官
日給斗粟數十百錢同爨十口罄罄然皆有菜色必貨
什器質衣衾而後充其費窮如是困如是誓不忍學穿
窬之盜蠹耗蒼生而苟且衣食雖清白之吏忠信之民
以心許我而時命艱蹇終鮮知己昨以道干少卿陳公

公以一言譽之而未深省也退而度我生成之地無出
執事之門何則某為童之年嘗聞執事豁達正直提幹
吾道暨今處麾下復大聞執事荐拔良士盡公無私夙
夜繫繫然恨不能負綬執鞭以遂欣慕之心今少卿有
鄱陽之命而執事佞行常潤某之區區如熱得濯但恨
偶繁負薪之疾不能興不及稽首衡鑑之下仰干題品
之主豈天復未開某以明公知之乎願執事哀卹窮滯
聰察言行若矜其廉慎擢於行伍必能恪居官次守死

善道不敢貪慢以累明德若念其愚直舉之諫科必能
待詔公車對楊王庭不敢佞媚以辱通鑒詩云惟其有
之是以似之書云舉能其官惟爾之能是則善有所在
公其捨諸惟昊天曷日知我之不欺於執事也笑惟執
事辨而明之若執事聽之以為是誠幸矣若不聽之以
為非亦幸矣是與非窮與達皆取必執事願執事不惜
一言而裁之於戲日月逝矣功名未立文以足言頗至
狂直

上知潤州陳麗天書

伏以外諸侯之重二千石之貴唱首太平必舉賢雋夫
良樂之廢乘黃伏阜工倕之室梗楠在御豈有賢太守
之庭而無良士蓋知與不知爾伏念某四歲結髮從師
執鉛槧者十五餘載矣去年再踐場屋荐名天府方將
交闈春闈鼓行文陣屬邊陣多事簡書蚤午遣宰輔折
衝河朔先人奉辟請之命供傳遽之職發兵間道陷於
戎事帝用追念行加等之贈舉嗣襲之典命於柴毀之

際固讓不聽外廷有補以縣吏夙心素業埋鬱無訴今
者豈為遭遇執事總東部政威望隆峻銓度人物哀卹
孤幼故敢以片言薄技深自媒荐所望執事近觀厥言
遠察其行蕭艾之畹可擇蘭菊鳧鷖之渚亦有鴻鵠勿
謂冗官而非秀孝詩云惟其有之是以似之書云知人
則哲傳曰舉爾所知禮稱推賢而進達之易謂拔茅連
茹故文子之舉管庫趙孟之出淹滯善有所在人其舍
諸然某之所望不敢違此但覲執事鑒其好學少迴惠

顧使他人無庸賤之謗公府減奴隸之責今勾乙之暇
得和鉛弄翰荐舉之際許解官就試必能昂首掉尾自
求騰蹕上以副先人之心下以遂為儒之志遂得侍問
都堂揚摧今古射策紫墀條對急政將不在他人之後
以辱公舉語其報效則有先王仁義之道在惟下執事
者裁之

上開封府廉獻書

伏以國家因襲唐制小宗伯歲貢多士率以至公之器
裁為慎選之具而尚士流私議泥而不通身處孤寒則
望權門而怨豪族名籍禮部則陵後生而幸金紫故賢
能之書未上而毀訾之言已滿殊不問其藝如何耳某
以為銀黃之族不無材智金玉之室亦有忠信夫以乘
黃越國豈待十駕而邁途蒙射鵠何須再發而中是以
林居野處不足以自賢三應五上不足以自貴惟善之
所在爾但孤進有材則居豪右之上鼎族多藝則冠士
流之首又何待畧踐場屋多歷年所而後預等甲英傑

者哉故某居寒賤未嘗怨肩馬造未嘗憂誠以公道有所屬也今伏遇執事幹張斯文採擷英特豈敢自昧默而不言伏念某四歲從師讀書七歲學詩九歲學賦十有一而學文奈何天陋其辭不能穎脫而出今年甫冠帶方敢抱所有冒故鄉舉苟執事照之以龜鑑量之以公器哀其說右其技得致師文陣賈其餘勇輝煥士林飛躍亨衢則執事之惠非止謂生死而肉骨於戲以先王仁義之道取我者我當以先王仁義之道報之豈敢

引蛇雀故事飾為虛言惟執事者裁察之

上晁迥舍人書

伏以先王知文之可以守天下士之可以司文德故擇聰明方正之臣居左右侍從之列思得薦進以廣儒雅然則旒冕之側賢者不敢自私其祿皆欲顯忠良拔沉滯以自效故君明臣忠而後良士大夫進焉帝宋龍興奄有萬國禮樂之臣列於王庭而陞文章之職居顧問之地十而有一犹比肩也邇者執事步臺閣蔚有令譽

帝用明試擢居近臣斯文載光遠近文慶孤寒之士皆
離蔬擇醜翕然有膏梁之望誠以皇上之明執事之忠
千載一時不可失也伏念某生長閭巷結髮事師抱六
經知談仁義執刀筆知為紀述先哲之行從政之事雖
失其具體而得其枝派其如恹恹京輦間困於塵埃公
卿門閥峻如天梯而不可履物不能終否有時而泰果
遇執事不有清貴惠顧寒賤賜見於清閑之際而勉其
勞苦固非敢徼一面之福幸失得之舉但念服鄒魯之
訓累歲月之功不敢自賢以妄進不敢自愚以自退伏
冀執事平權衡以權其輕重開龜策以決其疑貳設鍼
石以導其聾瞽使迷途無長往之嘆苦學無虛費之勞
傳曰朝聞道夕死可矣蹤迹如是勤拙如是惟明公裁
之

答杜侍郎書

月日具官夏某齋祓再拜復書於某官某跪啟溫教數
四成誦仰銜意爰至感至慰某資性婞狠門緒卑子零

丁士途孤苦萬狀恭惟高明素所諒悉不圖虫篆之枝
猥當鉞斧之選戎畧方警理不可辭竭忠盡愚深自策
勵豈意天幸有二成於鉅賢內手捫心何階至此也哉
秦川舊都土風豪侈氣勢相高禮義幾廢腐儒淺識以
為漢唐遺老衣冠舊俗可以三代德教化之過客貽職
以迂闊相笑小人詆訾或浸淫工聞前史所謂隣城嗤
其不能也而執事力庇其非稱以為是鏖金積羽言下
頓消此天幸之一也党項餘孽跳梁徼外宿舊亡沒靡
所容度加以罷輟無他智術但憶黃卷中一兩事若武
安之守鴈門謹烽火明斥堠饗士習射數歲不亡失終
然破虜羊祐鎮峴南各保分界無求細益陸抗以為彼
專為善此專為暴是不戰而自服也終亦平吳心頗慕
之以逐麋之犬尚不顧兔豈有將王師而循小利以一
華人易一党項者哉是欲堅壁清野以須遠畧不求目
前首級之效前之所謂邊兵皆以為怯者也而執事獨
護其短飾以威名衆言十七衆譽隨之此天幸之二也

矧五原塞外地平道濶自古西戎入寇之路臨涇孤壘
去大垂峽止八十里無梟將勁兵控扼衝要而賊騎遠
去高奴山谷纒屬地險兵厚謀臣猛將併在一城而逆
黨窺之無他但勇其難而忽其易謂非時者不能輕重
於敵不足顧也其於謹備西北敢不夙夜竭節以奉明
戒延安之警沿邊將佐皆被朝旨秣馬厲兵分壓賊境
以為聲援旋聞賊騎遁去皆如明識之所前料也所恨
者未能縛致戎首戮之藁街草壯麥黃尚煩廟筭飛芻
輓穀重擾邊民憂寤傍徨未知攸濟又念本出寒緒不
達人事但為學古入官以為得計焉知以書御馬為世
所嗤獨明公信之憐之豈孔門之道果不負於後人耶
何鉅賢之眷眷若此乎東望旌檠無任瞻依感戀之至
不宣某齋祓再拜

欽定四庫全書

文莊集卷二十

論

定四時別九州聖功孰大論

宋夏竦撰

先王之有天下也仰觀乎天俯察乎地天以四時為佐故歷候不得不正也地以九州為紀故疆理不得不別也昔在帝堯稽法天象申命羲和期三百有六旬有六日以閏月定四時成歲暨禹乘四載分別九州隨山刊

未洪水無害然皆上古帝王之聖功而有區別焉夫聖人經始萬邦勞心百度皆欲先天時而後地道也三皇之季盛德廣大陶唐氏慮天時之不順正朔之不叙節候之失度日星之失次厯算之失數人民之失所乃命四岳欽若上天厯象日月星辰敬授人時所以明天道也洪水襄陵羣生昏墊夏后氏疏鑿山川流導四瀆分田壤之等降定貢賦之隆殺桑土既蚕生民粒食所以正地道也夫天時正則霜雪風雨於是乎可信上下經紀於是乎可象芒申羽毛於是乎茂育政令教化於是乎可期故辰弗集其房而夏君征其畔官火犹西流而仲尼罪其司厯蓋百王之大典上古之彛訓也然則定四時成歲何先乎閏餘說者曰周天三百六十有五度四分度之一以三百六十日為一歲餘六日三十日為月月行疾又歲餘小盡六日故五年再閏以定四時之氣也夫地道別則播種耘藝於是乎有常賦役職貢於是乎有典原隰墳衍於是乎定位昆蟲魚鱉於是乎有

宅然則平水土何先乎九州說者曰州者疇也言疇其土而分別之也蓋閏餘不正則歷象不叙則天紀擾矣田疇不分則貢賦不至貢賦不至則人事廢矣傳曰太上立德其次立功竟之道定四時而修天紀立德者也禹之道別地利而正人事立功者也功德之際固不同矣

九功九法為國何先論

夫有國家者稽考往制裁為政術故彛倫攸攸萬事允治經緯不紊於繁上下皆底於道然則以典故為政者其大有二有九功焉書水火金木土穀正德利用厚生是也有九法焉周禮曰制畿封國設儀辨位進賢興功建牧立監制軍詰禁施貢分職簡稽鄉民均守平則比小事大是也然則致治之本何從而先者八世之君不相沿襲帝者有帝道以御天下王者有王道以御天下帝道廣而大其制也簡故其民從之而不拂王道明而正其制也密故其民從之而不違當其陳九功於舜禹

之世其言要而其用也普其帝制之餘乎正九法於姬周之始其言辯而其用也周其王制之餘乎夫萬物非五材不用故九疇以五行爲首民非穀不食故八政以食爲先不正德則教化不達故書云德惟善政不利用則民事不濟故易曰日用不知不厚生則國計不豐故書曰民惟邦本由是善爲國者修五材而民用足矣貴穀而民食豐矣正德而天下之心服矣利用而邦家之用濟矣厚生而百貨之本達矣故六府三事允治然後可以制畿封以正其法辯儀位以節其事進賢才以懲勸建牧守以司察詰軍禁以繩糾施職貢以制財簡鄉民以施教均守則以結信正小大以表禮著爲先聖不刊之典垂爲百王不易之道蓋夫帝制者尚道德者也王制者尚法度者也先道德而後法度則民懷之而從上矣若去道德而專任法度則四海之政官府之事將有察而不勝者矣於戲臯陶周公之心可以知之矣

舜無爲禹勤事功德孰優論

天生烝民立之司牧寔曰天子天子必張官設吏布德行惠以懷萬民驅之四方上下惟其所從在其治一也而其道固不可同矣三五之君其治之至其德之盛際天接地垂映列辟者皆曰舜禹則舜禹可以謂之盛德夫舜以無為而治天下禹以勤事而陟元后然則無為勤事其有隆殺矣夫聖人功業既殊教化皆異其德隆者其功逸其德殺者其功勞逸者合於造化而及於物者也勞者滯於形器而立事者也故言事者勞逸之際不可不察也夫無為者逸也何以逸能任人也聖人勞於求賢逸於得士當有虞氏納於大麓遂陟帝位任四岳以主內事任十二牧以秉外政任大禹垂益伯夷夔龍以平水土以典禮樂以掌山川以治百工故可凝旒垂纊而御遐邇適當宁深拱而行教化德與天道契乎淵默詩云不識不知順帝之則書云知人則哲能官人安民則惠易曰垂衣裳而天下治其是之謂矣夫勤事者勞也勞者何蓋自任也聖人憂勤以圖治躬親底績當

夏后氏受帝之命人厥水土乘四載而導江河別九州而差貢賦任其桑土分其土宜聞啟之泣而不歸擲風沐雨而無倦授元圭而告成功以聲身而為律度故能功著萬世濟於生民詩云弗躬弗親庶民弗信又云小心翼翼其是之謂乎故聖賢之言舜也則稱其德曰無為而治者其舜乎又曰舜有臣五人而天下治言禹則稱其功曰盡力乎溝洫又曰微禹之功吾其為魚矣蓋德者形而上者也功者形而下者也立德立功之道其殊久矣况禹受舜命而告厥成功乎

曾參不列四科論

登四科者十人而已德行顏淵閔子騫冉伯牛仲弓言語宰我子貢政事冉有季路文學子游子夏而曾參於孔門為達者也不預十哲之選其故何哉夫仲尼生周之末立定哀之問斯文中微不絕如綫乃以仁義之道行忠信之事考其行事采其材智得是十子第為四科以標儒雅之道其選蓋至矣而參不列其間者念其道

有所未至矣試嘗論之曰孔氏四科之選皆有賢哲之
具体者哉非各言其一也賢者百行之先闕一不可顏
閔非獨以德行選也游夏非獨以文學舉也宰賜非獨
以言語稱也冉季非獨以政事擇也蓋有五常之其德
而後列其所尤至者哉故德行者豈無政事政事者豈
無言語言語者豈無文學斯互舉所長之言也而曾子
惟以孝行著聞不能具得能者之体但行其一端故所
以不列於十哲者也若孟子所謂伯夷叔齊聖人之清
者也言夷齊不食周粟采薇首陽蓋得聖人之一清德
耳蹈道則未也由是觀之則參之事夫子學其道推其
心但得聖人之一孝德耳言其材則未也或曰參也孝
何以非賢哲夫十子者有四科之德豈無孝乎蓋孝在
其中矣三千之罪莫大於不孝仲尼之門英賢之選而
薄於孝行聖人之心何以言哉或曰孝者百行之先居
左四科之上夫孝養之道誠為至性然莫逾於德行故
仲尼嘗曰孝哉閔子騫而居德行之科蓋孝者無以逾

於德也是則有其德然後列在其間而參之孝一介之
孝也仲尼嘗曰參也魯故為之說天子諸侯之孝以治
邦國以及百姓以廣其志

開封府試三正循環宜用何道論

先王應天祚敷政令歷象為貴因損為重故春秋之義
正月居王之下示正朔自王者出也當帝道標季王化
資始夏商周之君代王寅丑子之正攸斲夏后氏憂勤
而治溝洫禫讓而陟帝位以大簇為正簇者湊也萬物
湊地而住陽德之盛者也其色尚青其樂大夏祭禮尚
氣牲用驪駒商放桀而取神器慚德而朝萬國以大呂
為正呂者助陽宣氣盛德之中者也其色尚白其樂大
濩祭求諸陽時用日中周伐紂而王天下戎衣而威遠
邇以黃鐘為正鐘者種也律呂施鐘而出盛德之初者
也其色尚赤其樂大武禮貴無用牲取騂牲於戲商循
於夏不敢居盛而處中周循於商不敢處中而履初故
觀之正則其道可知也仲尼曰行夏之時又曰吾欲觀

夏道是故之祀而不足徵也吾得夏時焉蓋知夏之律
歷四氣可以平分也三代之季秦以十月為正漢初因
其弊而終革之太初已降率以夏正為定典夫陽生於
子大人道長羣陰尚壯天地閉塞若政教立而未布文
章施而未煥陽漸於丑其氣欲勝宇宙凝滯庶物犹蟄
若刑政孚而未達化育至而未成陽瘵於寅其道大振
草木甲拆土膏肱起萬物喜其嘉會陰德伏其摧剝若
道德之教未畢禮樂之文皆至易所為聖人而萬物觀作
之時也吁政有大小德有盛衰三王不可以共議三正
不可以同道當循環而後知其政德焉故史遷曰三王
之政如循環窮則反本國家革五代之弊繼隋唐之基
謂湯政多慚周業孔武不足以表仁義之化宜乎用夏
道躋禹德所以同時令齊閏餘節春夏之和正歷侯之
始使告正朔於天下而民知其盛德焉君子曰邦有道
雖商周之正可也邦無道用夏正將無補

曹參守職論

漢曹參自齊入相飲酒繼日惠帝讓之參謝曰陛下自
察神武孰與高皇帝上曰朕安敢望先帝觀臣孰與蕭
何上曰似不及也參曰陛下之言是也且皇帝與蕭何
定天下具法令陛下垂拱參等守職遵而勿失不亦可
乎吁君之不逮在賢雋致之則堯舜可也已之不逮在
道德進之則臯夔可也況世革秦弊時在守文創業之
君則兵以詭勝事以時設有刑戮之威而無繩墨之制
高皇帝承秦弊而起遠近響應數年之間平定四海暨
繼世之君則當守仁義循法度制禮樂易章服撫內外
明刑罰官賢材親宗族所以基太平而遵王道也傳所
謂王者必世而後仁故文武之政周公制之成王襁褓
而德及三代豈成王之德參於文武乎參上不能致君
下不能自疆况治民乎君則限以高祖已則限以蕭何
而不知古聖賢有殊功異伐者矣謂天下定而不可復
危法令其而不可復易我不擾則天下靜我無事則天
下定嗚呼三城長安後衆百萬簡易之道邪降灾雨血

桃李冬花無為之應邪勿失之職復何在哉蓋參祖尚黃老飲酒不治憑託異說以致王室陵遲諸呂弄權寔參之自歎

獄市為寄論

夫先王獄以定刑市以聚物刑必正其枉直物必辨其良偽其未尚矣漢曹參起於獄吏執圭而侯以將校之材迹黃老之弊政事之失必以寬晚歲罷齊相屬後相曰以獄市為寄慎勿擾為相曰治事大於凡乎參曰獄市所以并容也今君擾之姦人安所容乎吁獄者鞠訊過罪笞掠參至姦吏市法出入生死良民受辱引罪自誣大獄一起寃者大半在乎察人情偽繩吏之深刻先王以明慎用刑而不留獄禮曰悉其聰明致其忠愛以盡之市者聚會民物質遷有無貪賈縱欲翔貴時價儉民幸利雜良以苦在乎節馭儉於末民戒巧詐於貪夫先之以經制後之以教令周禮曰量度而成價賈劑以結信王制曰姦色亂正色五穀不時不鬻於市周孔二

君子制禮刊書罔不盡聖人之道絕姦宄之路故姬旦
滅商紂誅管蔡而成康刑措四十餘年仲尼為中都宰
市無二價路不拾遺蓋成之以廉恥防之以仁義衣食
足而民不爭刑罰舉而民不犯也而參以獄市之大并
容不擾蓋德吏而殘人命惠姦而耗民財亂則可期治
乎何有後相之語欲具大体參不能以正君臣尊王室
審號令捉綱紀之道語之反以亂政寄為後患夫漢接
秦弊化墳藉煨燼世無所聞而黃老之語在焉苟擇其
善者從之亦可以少裨政事而參乃入不由戶反道亂
常得非舊獄椽縱姦為豪豎處上位鬼傷其徒馮托異
說以惑於世邪悲夫

開東閣論

漢平津侯開東閣待賢當時諸儒亦有稱者近世以為
有急士之風美其事者多矣而或不知其意為夫侯起
於徒步屢歷顯位而指陳兩端以惑時議棄背宿約以
阿上旨外無別材飾之以詐至於令粟布被飯脫粟故

買臣難其短汲黯訐其偽自知無功以速官謗故設東
閣假待賢之名以誘士大夫之譽夫待士者育其材觀
其能採其謀而行之擇其賢而進之故平原下士得毛
遂以安趙郭隗禮賓得樂毅而霸趙燕侯為相六年招
待賢俊而史籍所載由其門出者卒無一人豈漢併六
國而無賢乎當此之時匈奴寇邊諸侯構怨侯未始定
一計以安之豈多士而無謀乎夫開閣而不能待士待
士而不能與卹虛廩庫何異為設使相天下者賢材
在朝則進之在野則升之豈開閣而後為賢哉於戲嚴
助董仲舒之徒賢人也侯而蹈之寧有進人之意邪蓋
善為釣名在詐之術使後世美之惜哉

不教吏職論

漢薛宣不教子惠以吏職漢書備之矣且曰吏道以法
令為師何可學也時人以為然夫國家之大者君臣也
家之大者父子也君臣正則國政行父子正則家道成
君明而能教臣忠而能諫則國之正矣父慈而能訓子

孝而能爭則家之正矣石碣教子以義方仲尼戒鯉以詩禮韋賢授以一經鄧禹專之以一藝後世稱之夫成童不就師傅父之罪也况父而不教乎蓋事莫大於學學而後能其事銷金石者不累採曲木者不累月若教子以一經之書三尺之法則不止於職也夫吏職者民以寬猛吏以畏愛事以時變教以俗設府寺州縣郡國天下雖大小異器而其政一也何謂不可學哉夫生而知之則周公仲尼其人也自茲以降未有不學而成者

漢興則仲舒學春秋而建大議安國學尚書而為通材君明學易而知變稚圭學詩而從政故判斷無失宰割有宜厥功茂為宣謂不可學者蓋起於獄吏斗食之下暴歷顯位不習經義何以語人哉嗚呼吏事不能言况大道乎子不能教况生民乎故當宰天下之際官屬議其煩碎天子淺其儒術六年無補於政事宜其放棄焉

李德裕非進士論

唐文宗議貢舉曰子弟寒門但取定藝宰相李德裕對

曰臣無名第不合言進士之非其祖尚浮華不根寔藝
朝廷顯官須公卿子弟自小便習舉業日熟朝廷問事
臺閣儀範不教而自成寒士固不能習也夫治平之器
曰政布政之具曰文守文之基曰道行道之夫曰士士
之於政由左右手焉故有國之典先夫取士雖沿革異
軌而同歸求聘之塗古者諸侯薦賢有三適之制射宮
選士觀五善之節姬周受命文物明倫群吏獻賢能之
書登於天府樂正論造士之秀升於司馬進士之名立

矣禮賢之道廣矣暨六國行玉帛之聘兩漢立四科之
選魏晉或表薦而登仕齊梁或版辟而起家故孝廉明
經之科秀才茂才之舉限口限年之制射策待詔之選
損益無常而察德觀言之規不妄設也李唐御艱統厥制
度立進士之科正名也行辭賦之選從時也而天下之
士誦詩書秉刀筆秉仁義之道而進朝廷闢場屋詔宗
伯以方圓曲直而取名材大儒比比而有然詩賦之制
非古也古者國風雅之謂詩不歌而頌之謂賦暨三季

移統七雄黷武大道既隱正音去矣故少卿五字以叙
別邠孟四言以述祖陸謝勵鋒於晉宋任范治榮於齊
梁詩之体失矣頌刺之義微焉若孫卿暢幽惻之意屈
宋起迂談之說相如閔衍以前慕楊雄淫鹿而後殿賦
之体隳矣規諷之音哀衰為唐興文流愈甚前失執彫飾
為規矩正麗偶為繩墨詩則協聲而合律賦則限韻而
拘字燦然清才而不復質矣譬諸栢梁永明体犹若秦
漢之於唐虞也故德裕許其浮華則可矣至於言朝廷
顯官須公卿子弟斯言之玷無乃甚歟夫諸侯襲封功
功繼絕須子弟奉祭祀而爵及世也若其靡恃門閥之
貴屈身士大夫之間誦習仁義延揖時譽有緇衣之美
成作述之志雖寒士之賢弗可知也若其尚輕肥之飾
馳逐豪俠之伍以奢僭自大意氣相燦不知衣食之出
而忘弓裘之業雖將相之世不可任也哀哉堂構之業
之業多遜嗣興之賢甚寡若子弟不教而成則堯之丹
朱舜之商均皆可居天下也况父母之聖非教不行也

國之治非目不熟也臣之良非師保之無功也何教之
而不成目熟而不知保傳而無補哉蓋上智下愚之不
移也故楊與說於史高母薦乳母子弟王吉疾其驕驚
請除任子之令則知子弟之才非專任之器也詩曰其
父析薪其子不克負荷書曰世祿之家鮮克有禮况朝
廷崇爵豐祿設案分職治亂之道不在它而在賢愚也
子弟寒士賢治愚亂其一揆也然則子弟以嗣蔭而受
祿士以歷試而頒爵歷試之下黜陟章明故士之不肖
者鮮矣至如傳說胥靡而興陽呂望屠釣而王周管仲
商販而霸齊由余戎狄而強秦斯皆歷試諸難登將相
之任誠不讓於子弟也故舜湯不用三公九卿之世而
舉臯陶伊尹不仁者遠矣易曰賁於丘園書曰野無遺
賢則豈謂子弟邪若以寒士窘急衣食不能熟習德業
則仲舒下帷倪寬帶經乃子弟耶若以寒士杜門閤卷
不識闕朝儀範則仲尼正魯國之雅頌叔孫定漢之儀
制亦子弟耶夫志士之學也終日不食終夜不寢將負

周孔之戈而春楊墨之喉以聖君之道左之生民之心
右之誓銷滄薄之器於太平之爐故遑遑然急於行道
也雖九經之奧必執仁義之資載籍之廣必取禮樂之
制前言徃行燦燦在目立於朝無慚色無愧辭也書曰
學古入官此之謂歟得士之道不其偉哉詩曰思皇多
士生此王國於戲宰制天下代天工也當改正朔易服
色制禮樂發號令草襲因損頤指而行何不合言之有
苟以選舉之制離失中道則以德進以事舉以言揚擇
善而行斯可也苟謂辭賦非古則策以時務問以康濟
非五經不得以對非常道不得以言則經緯之術宏達
之材見矣而德裕以林音甫餘烈陟位國相知簡賢附勢
之旨無宰制補衮之德而塲屋之下英傑間出縉紳之
士勲名相望欲聘材術專國政不可得矣故將噶貢舉
以杜賢路進子弟以崇私黨俾朝廷之人無能傑出已
右故宣宗制曰委國史於愛婚之手寵秘文於弱子之
身洎參信書亦引親暱斯乃扼其咽喉而中其膏肓矣

厥有朱崖之貶以謝天下宜哉

秦烏氏保與朝請議

議王者賞不失功爵不墜典車服有等貴賤有列所以
賢者知勸而禮不踰閑也秦負戰霸之業竊乘帝王之
器下良民而右富商棄禮文而圖貨殖烏氏保以繒綵
私遺戎王谷量牛馬令比封君而與朝請吁非三公九
卿之世無平邊富人之策徒以交市夷狄畜聚蕃育起
於商販之下而伍侯霸始無一命之重而參朝謁名器

兩失禮義交喪古者位以制賢祿以酬庸論道經邦以
被公衮積行累功以致侯服今茲澆漓淫而不典儒學
之道固敵貨賄之力將相之世靡及并兼之家雖天子
親傳組綬躬給廩食位不以勸賢材矣古者朝以辨等
覲以頒制玉帛修贄而後會等威有序而後見今用非
辟彘倫喪敗銀黃之貴而肩秦牧之夫明堂之下而朝
畜產之主雖闕廷日定冠冕歲制輿服禮不足以別貴
賤矣使耕墾之民游手商賈裘奇珍之貨私囚奴之人

修六擾之業競力錐之利滯貨以要君上累鎡而駕公
 族翕然風從以競末作是則稼政不修蒔氣不緝栖畝
 之糧不暇獲吐絲之蚕不及飼卒有凶札之變兵革之
 急萬民罄罄金玉不以餬口六軍凍瘡牛馬不以挾纊
 雖欲復農不可得也於戲惟名與器不可假人賞罰自
 失沮勸則差故禮賜君子小人尚不同日蓋慎之也守
 國之器禮之為大去禮而行何以享國宜慎守之哉

宗
唐免宋人役議

議曰後徭役者地則兵火凋殘水旱沴疫行幸所經戶
 藉新復人則鄉有善行家無無丁者預焉斯有國者之
 典法也李唐氏受命之二載詔天下宗人無徭役吁李
 氏之姓伯陽之後周距隋季且千餘祀姓族蒸蔓率十
 三四為既高祖秉隋室之弊北起晉陽西圖函夏百姬
 烏合附成大業者非獨李氏也何黨之甚歟書曰一人
 有慶兆民賴之又曰元后作民父母是則天下之親皆
 親也天下之姓皆姓也若諸侯陪臣因王父之字以為

氏則天下之民以君為氏明矣而不姓之者不可一也
三皇之世則三皇之民也五帝之世則五帝之民也堯
之民比屋可封非獨初氏也紂之民比屋可誅非獨子
姓也禮曰不獨親其親不獨子其子書曰無黨無偏王
道平平傳曰君子不患寡而患不均斯為之義何以處
之前所謂兵火而免者蘇其業也水旱而免者濟其艱
也行幸而免者疇其費也新復而免者寬其作也有善
行而免者勵修德也無煎丁而免者俾養親也至於同
姓而免者餘不知其所利焉則天下豪猾之民將棄己
氏而即李姓濶耕廣種而幸成其私行之不也則天下
之姓三分而二冒於李矣

			<p>之類三合既二國餘皆矣 久而酒車 致而免管銷不</p>
--	--	--	---



